

Endy Croes ta keda deteni

ORANJESTAD – Manera Bon Dia Aruba a publica, ayera mainta Hues Comisario lo dicidi si ta prolonga e detencion di e ex director di Lotto pa Deporte, Endy Croes of no. Prome e decision mester a tuma lugar 10'or di mainta. Endy Croes a wordo hiba Corte y por a nota pafor di edificio di Corte un cantidad di personanan cu a bay busca drechi di nan amigo, conoci y famia, Endy Croes.

Continuacion pagina 2

Hues Comisario a autorisa e prolongacion te cu diabierna awor

Endy Croes ta keda deteni

Continuacion di front

A resulta cu Hues Comisario a bisa cu e momento ey ainda e no a caba cu su evaluacion y cu ayera merdia 2'or e decision lo bira conoci. Ayera merdia 2'or a bira conoci cu Hues Comisario a honra e peticion di Fiscal pa prolonga e detencion di Endy Croes cu 8 dia y cu e 8 dianan aki a cuminsa corefor di siman pasa diabierna. Esey ta nifica cu diabierna awor Endy Croes lo mester bolbe presenta dilanti Hues Comisario pa bolbe evalua si tin motibo pa e keda mas dianan sera of si e ta wordo laga liber. Manera ta conoci, Endy Croes ta deteni rel-

aciona cu interrogacionnan cu ta tumando lugar door di miembranan di Landsrecherche relaciona cu e caso Lotto pa Deporte. E procedura di detencion ta canando su caminda o sea e prome 8 dianan di prolongacion a tuma lugar. E di dos fase lo bira cu Hues Comisario e ora ey no ta bay solamente ariba beneficio di investigacion sino lo bay ta mas critico. Hues Comisario lo evalua con e investigacion a desaroya y si realmente tin indicacionnan cu ta musta riba Endy Croes of no.

Si na opinion di Hues Comisario, no tin suficiente indicacion, esey ta nifica cu e no ta prolonga e deten-

cion y ta ordena pa laga Endy Croes den libertad. E momento ey, Ministerio Publico por apela contra e decision aki.

Di otro banda si Hues Comisario prolonga Endy Croes su detencion, e por apela contra esaki.

Dentro di tres dia lo bira interesante pa sa kico Hues Comisario lo pensa e momento ey di e caso. Manera Bon Dia Aruba a splica, por surgi e situacion cu miembranan di Landsrecherche ta haya cu nan ta cla cu nan investigacion y esey por conduci cu Endy Croes por wordo laga liber prome cu diabierna. Tempo lo mester musta si esey ta asina of no. □